

四庫全書

集部

欽定四庫全書

集部

翠渠摘稿卷八

詳校官中書臣賈鏌

中書臣劉源溥覆勘

總校官進士臣楊懋珩

校對官中書臣吳甸華

謄錄監生臣吳炳文

欽定四庫全書卷

翠渠摘稿卷七

明 周瑛 撰

五言律詩

題湛菴為戴陳州作

此菴有佳士物我兩相忘  
人世紅爐熱渠心秋水涼  
綺羅無美著藜藿有餘香  
晚路行猶遠煩君更自防

訪仙遊鄭東園和翰林諸公留別韻

賜告下蓬萊山居亦樂哉開窓邀翠巘掃石護蒼苔  
冗泛謝塵事清夷養道胎學充還出去鸞閣正需才

邵武道中夜宿半山鋪

邵武城頭路行行重苦辛高山雙倦足空館一愁人  
涼月照華髮西風吹敝巾長安一萬里何處問通津

清明節寄諸弟

疎雨清明節客中思不禁荒山一杯土孝子百年心  
竟歲身南北終天悲古今薦繁託諸弟揮涕滿衣襟

題慈節卷為蕭給事

瘞賦

內則讀遺篇持循自昔年從夫念一醮教子學三遷絡  
緯秋燈館釵鈿曉爨烟平生慈與節太史費摩編

送友人丘安重知瑞安縣

論交三十載此日歎分離海濶飛鳬迴雲深過鴈遲近  
民宜直易作事貴操持莫以纖毫累翻為負所知

和陳公甫神樂觀夜坐韻

蟲聲秋院靜木榻自來憑細數千年事閒挑五夜燈子

房真學道王旦謾為僧湖水渺無際寒魚不受罾

題謝侍御乃兄石溜鳴琴圖

幽人結屋處石溜響潺潺  
桐木不須削梅花能自彈  
鶴鳴山月小魚躍水天寒  
安得脫塵屣從君坐夜闌

到廣德作東園書室

東園有餘地可以作書齋  
千古聖賢學百年經濟懷  
庭松雲外鶴池草雨中蛙  
五色石堪煉吾將師女媧

西壇即事

夜半壇頭路露華寒襲衣樹深燈影亂野曠珮聲稀精  
意無人會豐年祇自祈周家聲教遠幽雅更重吹

白雲寺午炊

樓閣四簷合松蘿一徑分微風傳夕磬疎雨引朝薰人  
世幾滄海青山自白雲午炊猶未熟騶從復紛紛

南湖夜發

時往見巡按御史白疑獄

扁舟發初夜渺渺入平湖水滿天上下雲深山有無琴  
聲人共遠燈影客同孤借問柏臺樹春鳴何處鳥

世美堂為戴提學侍御作

世美堂前事人間能幾何一門三執法二世十登科  
笏牀頭滿勲名字內多曉來看山色佳氣正我我

自題畫像

對此丹青筆今吾始識吾秋江片石瘦冬嶺一松孤  
不  
是廟堂器真成草澤癯行當返初服歸以讀吾書

山亭晚坐

獨坐山亭晚蕭然一徑開雨聲驚醉夢山色護詩胎  
愛



靜應逃俗養高成廢材城闔纔咫尺未許世人來

自警告諸僚友

脚下程途遠鏡中毛髮絲治狂須止酒醫瘦莫吟詩勿  
謂性多僻須知聖可師忍將錦繡段白日棄泥淄

書滿南歸同年屠元勳邀李西涯諸公十有二人  
餞別分韻賦詩予得魚字

湖海多年別衣冠此夜俱可因同綠醕更復唱驪駒去  
路青山外層城白雪初他時相慰問萬里只雙魚

夜渡淮河望西湖嘴作

孤舟發深夜歸路屬殘秋  
野曠星辰近江空霜月浮  
得風帆力勁順水櫓聲柔  
遙望西湖嘴青燈映小樓

夢中賦登金山寺

高閣逼霄漢客邊望眼開  
鴈將秋色去潮帶夕陽回  
天地雙蓬鬢興亡一酒杯  
此懷不可極倚檻獨徘徊

過蘇州與丘時雍李應禎夜話

今夕是何夕長歌朋盍簪  
參商照天角風雪滿山陰  
衣

袂秋陰薄簾攏燭影深情長嫌夜短一刻比千金

姑孰道中

采石孤帆落青山一騎歸朔風吹短髮疎雨濕征衣野  
火漁歸市林鐘僧掩扉可憐江上鴈入夜更南飛

夏日建平道中

天時早晚異地氣夏秋同雨脚青山外雷聲白日中馬  
飢頻嚙勒人乏半扶筇薄暮到城郭月華生樹東

冬夜和賈汝陽韻

獨坐不成寐夜深天欲霜爐薰生細縷燈暈結寒光世  
事鬢毛短客懷更漏長引杯聊自酌非是為詩狂

橫山與吳水部

程晚酌

公餘幽興發並轡入林巒雲暝鳥將盡雨深僧未還簷  
花落鄭館野韭薦蘇盤水部原能賦令人屢解顏

次韻酬蔣宗誼節推見寄二首

蔣君年最少真是謫仙人才美應無敵詩成若有神玉  
堂曾借稿紫府賸留春虞網何時下東山有鳳麟

別君未數載倏忽將衰人學未究天地行多慚鬼神徘徊海上夢寂寞江南春况聞左車子西狩踣祥麟

橫山燕集二首

小甕藏天地大杯揮古今宦情秋夢短世事海波深北枕淵明卧南耕梁父吟官卑多抑畏慚愧昔賢心  
一鞭寒日裹弔古復傷今鳥背秋陰薄馬頭山色深朱絃方斷絕白屋正呻吟安得范司理同攄經濟心

與陳貳守酌別

下馬何村廟霜清木落時行人千里去故國一年期水  
色照衣袖山光落酒卮離懷難盡遣惆悵為題詩

新歲枕上作

讀書三十載此日得為州世路行來險官居輕若浮名  
高思自抑福淺戒深求天道有盈歇吾心當熟謀

暮春山中風雪如臘

春光憐欲盡氣候未全平屋霰激寒響簷風吹朔聲蠶  
登何處箔牛廢此時耕歲計知無賴憑誰達聖明

游石溪寺二首

細數頭陀路紫紆十八盤外疑無處入中覺有餘寬猛  
水擘山出奔雲擎石還誰能謝塵鞅來此共盤桓  
四面峰巒合有僧深處居舊廬甲乙在廢殿丙丁餘水  
色侵衣桁山光入鉢盂小詩吟未就斜日滿軒車

入宣州

落日滿宣州馬頭春事幽山佳多入郭潮漲欲平疇  
夏竹農驚鹿吹蘆僮牧牛澄江與疊嶂掩映謝公樓

出郭

騎馬出東郭茅簷遍拊循吏需寧復急民俗可曾淳  
蕭鼓雲中社桑麻雨後村漢家循吏傳原不錄劉昆

歸舟至毗陵阻凍懷老母在官所作

一上歸舟日便為見母期誰知咫尺地翻作逗遛悲  
冰合河流斷雪深山路危高堂念游子正是倚門時

宣州夜坐閱公案有作二首

少學屠龍技晚收効鼠名深情數日辨弊牘幾番更自



古雀無角方今蠅善鳴就中生死路不敢負神明

鄒公述仁義申子說刑名俯仰人千古徘徊夜二更燈  
寒花不結牕破紙常鳴聽盡階前雨東方未肯明

成化辛卯聞長樂縣平地涌成山阜

天地人身體如何生贅疣昔年傳息壤今日見浮丘陰  
下何居上陽剛不制柔五行精義隱孰為獻宸旒

過田家午炊

午炊猶未熟坐向野人家為愛青山好都忘白日斜山

糧收橡子野菜拾株花偶聽老農語因知桑與麻

有所思

目斷天涯路春深有所思  
亭臺花落後簾幙燕歸時  
洛浦煙初暝巫山雲正癡  
夫君縱忘妾妾意比芳絲

曝背和賈汝陽韻

四海誰同曝半簷  
吾自分背溫如挾纊  
氣煖欲蒸雲  
瘦影傍梅見  
鼙聲隔竹聞  
愛君思有獻  
點竄列生文

壬辰重見彗星

有彗起東北光芒天際浮三年忽兩見十日未全收  
自是人心玩誰言天道幽魯婺不卹緯涕泗欲橫流

懷季弟敬叔

三歲不見汝悲歡各一方書成仍契濶夢覺每淋浪  
舐犢懷偏惡鼓盆悲正長郊原風日滿怕上脊令岡

過鄉溪懷五宜翁

就徵一應詔擇退五稱宜古道甘藏拙長謀曾出奇  
閩中新郡縣江上舊旌旗落日鄉溪路令人有所思

弔吳聘君

富貴路方熾山林跡漸稀誰能甘白屋君獨謝黃扉學  
古難為用名高易嫁非百年泉壤下全璞有光輝

理陸象山祠堂

祠堂無多地令人起歎吁鄭田侵蝕後袞邑質交餘白  
髮啼孫子青山式里間公庭今得理契券有明書

重到府第有感

初鶴洲族兄握符臨汝予嘗游焉今予復來而

兄已下世矣俯仰疇昔重為淒然

府第最深處重來感歎并臨川雙郡守閩海兩書生風  
雨情何限池塘夢不成坐觀循吏傳收拾此家聲

過吳草廬墳

停車官路左遙認草廬墳古木無繁蔭殘碑有斷紋大  
道近來隱微言今益紛九原不可作誰為啓昌聞

雙流遺愛祠為孔都憲乃翁題

郎官皆百里遺愛獨雙流畫壁丹青古芳祠花木稠田

疇僑與殖禮樂偃曾修血灑麗牲石民心春復秋

予改郡聶雲章許時髦送至江潯夜宿予舟賦此

為別

二君憐遠別為我此宵留風雨城南路波濤江上舟  
奇材慚賈馬絕技笑屠牛功業吾何有輕雲天際浮

玉臺除夜

閩路此時驛越王前日臺歲從今夜盡人自故鄉來  
萬里程初試百年節自催東皇漏消息春意到庭梅

次曹時中曉發鷄關韻

路同函谷險江比渭川雄  
月白鷄聲早天寒木葉空  
客途方浩渺夷落少光融  
獨有朝宗念隨流日夜東

往平冒觀府基呈祁石阡

衛府夾江立分明是壯謀  
出奇相倚角據險扼襟喉  
官有藩籬固民無兵革憂  
國家修遠畧敢為借前籌

老姊自鎮海至

小兒千里至相見喜還悲  
燈火憐今夕儀容異昔時  
家

貧供億薄行苦鬼神知煮粥吾應會焚鬚不敢辭

簡陳太守以代面語

林下知心少使車歸頗遲未分半席語已是一年期臂  
痛難成拜頭風久廢詩回看府門路依舊隔天涯

巡按賀御史言事待罪次韻四首

賤賤鷹隼操藹藹鳳鸞儀去國八千里懷君十二時孤  
忠原自信直論不能移史傳多英傑應知有宿期

柏府瞻風裁天家惜羽儀六經非駕說三代是今時闕



失應思補災祥或可移夜來有封事默與鬼神期

聖祖功勲大多方奠兩儀誰云全盛世乃是諱言時筆  
短謀猷遠坐孤更漏移臣非愛多事法祖以為期

不學古賢哲謾修封禪儀但於匡主處便是致身時  
聖天曾補公愚山可移宸聰蒙省覽會見太平期

竹澗書舍為林壻雲從侍御題

愛子讀書處澗邊竹萬竿森森蒼玉立滴滴翠雲寒  
苦風霜勁心虛宇宙寬靜中思往事今喜得平安

七言律詩

送何郎中

宜

赴浙江督糧叅政

福清縣人

聖主龍飛重養民，  
催科特遣老儒紳。  
汲將兩浙通潮水，  
散作全吳潤物春。  
劉晏材高勞用智，  
陽城政拙可書仁。  
吾閩文物舊來好，  
重看聲光接古人。

送陳方伯

豐

致政歸漳浦

字尚勉，興學古行。

角巾斜折舊烏紗，  
南望鄉園趣轉賒。  
白髮無人堪結社，  
青山有地可爲家。  
石湖晚釣收殘雨，  
野徑春行礙落花。

不識廟堂諸故老幾人清夢到煙霞

送宋經歸蔚州

經領鄉薦復從予治經後同登進士

手折蟾宮丹桂枝那曾滿假更從師  
青由藍造藍應讓冰自水生水不知去路  
西風飛葉早故山疎雨出關遲  
上林春到花如錦正是都門待子時

送項主事

澄還南京 福清人從予治經

杯酒都門送獨歸不堪臨別思依依  
一霜薊北衣全薄八月淮南鴈正飛  
官列部曹無抑畏班聯鴈鷺有光輝

丈夫樹立應須早毛髮鏡中容易稀

喜翁冰厓擢方伯

冰厓初以工侍左遷衡州府守轉官

白璧含輝不染泥除書忽下大江西  
衡州事業南山近工部聲名北斗齊  
霄漢丹心回日月郊原赤子望雲霓  
懸知早晚推賢相又築長沙十里堤

謁文丞相廟

海上干戈百戰中孤舟夜夜泣英雄  
八千里外邊塵合三百年來宋厯終  
厓嶺被俘真倉卒燕山就義太從容

西風吹雨過柴市獨向祠前撫翠松

挽劉主事母太安人

一片貞心鉄石堅淚痕揮盡縞衣穿傳觀列女幾千字  
身事良人三十年慈竹蕭疎南畝雨諼花零落北堂煙  
每看季世豪男子誰似深閨劉母賢

送黃君

仲昭

左遷湘潭

朝把封章叩帝家夕驅羸馬赴長沙江湖萬里孤臣遠  
燈火九重春意賒湘水無情休作賦賈生有廟可停車

也知昭代多恩典試聽庭前半夜鴉

送濮守乃姪歸省二首

千里移舟下濮陽黃堂有叔鬢將霜竹林風月留人易  
椿府旨甘入夢長亭上鳥聲喧客席馬頭山色映詩囊  
料知宦邸無餘物帶得清風歸故鄉

曾聞大阮久專城小阮讀書亦有聲作客三年依濮上  
還家幾日到昌平樓頭疎雨此時夢馬首青山到處情  
莫戀故鄉風景好雲霄萬里看飛鳴

初到廣德州

馬蹄六月到山州，獨上桐川第一樓。  
城外有山皆北向，郡中無水不西流。  
士風質朴猶存古，民舍蕭條欲近秋。  
多少濟時心上事，夜來默與鬼神謀。

立春觀擡杠有作

羣擡長杠逐春來，紅綠參差照草萊。  
巖岫上頭走車馬，樹林深處見樓臺。  
百家技巧重重作，諸史幽奇色色裁。  
莫道東風快人意，東風容易耗民財。

久雨作 成化乙未秋

三月全無一日晴密雲疎雨滿山城公家正放輸糧榜  
民舍不聞打稻聲草色欲將官廨沒溪流直與野橋平  
壇祈廟禱渾閒事郵政多端先薄征

學書

四十年來始學書墨華長自滿衫裾枯藤礪硯火焚後  
繡鉄稜層土蝕餘豪氣稍充成老健中心纔放轉粗疎  
曹公去後朱公死千載何人尋後車



廣德書滿留別僚友

獨隨琴鶴下江東，歲月催人似轉蓬。  
路出南陽慚說名，馬辭渤海愧談龔。  
數莖白髮宦情薄，滿目青山歸興濃。  
相別不堪重相語，茆簷殘日有疲癯。

弔葉文莊先生

名盛崑山人官終吏部左侍郎

憶昔分符出牧時，先生欲我置曹司。  
本為枯朽溝中斷，看作珊瑚海底枝。  
半世行藏原自信，百年心事荷相知。  
生前門巷嗟無跡，死對荒墳酌酒卮。

挽鄉先輩林學士先生

名文進士及第

吾鄉山水氣真淳百十年來孕此身翠竹蒼梧人物表  
玉堂金馬禁城春龍頭往往推先輩麟趾振振見後人  
十尺穹碑照山色夕陽回首為沾巾

挽方柳東先生

名漸進士拜行人致仕

柳東深巷草堂扃一旦鄉邦失典刑鉄硯磨雲秋注禮  
牙籤翻雨夜傳經鼎龍化去湖空白岐鳳不來山獨青  
鄉社年年薦蘋藻可令清渭雜長涇

哭友人楊朝重僉憲

名琅提學山東卒于官

燈火同牕記昔時  
可堪回首重沾衣  
雲連海岱音書絕  
月照屋梁顏色非  
孝友傳揚通里巷  
諫章流落滿京畿  
夕陽目斷濟川路  
驄馬繡衣應不歸

挽姻友林貴實侍御

名誠以御史乞致仕卒于家

馬鬣封高宿草生  
思君不見重傷情  
使車處處風霜勁  
諫疏篇篇日月明  
薊北教波回薄俗  
江東鹽筴罷深征  
誰言天道無憑據  
蘭玉滿庭春雨晴

挽陳會元先生 名中

投刺曾修展拜儀，蒼容古貌記初時。  
雲霄獨步人皆仰，山斗齊名世所師。  
葩學盛傳無孔疏，唐音高和失盧詩。  
承家有子原同氣，不比伏生空女兒。

送鄧郎中成都歸省

萬里橋頭道路賒，宦遊十載始還家。  
春風門巷依前好，細雨桑麻近晚佳。  
厨下旨甘修玉髓，堂前杯斝泛晴霞。  
君恩浩蕩須回首，雲漢秋深望使槎。

送同年梅文淵分憲西蜀

與君江上酌春卮此後相逢未有期  
萬里雲山分袂處半天風雨倚樓時  
縣官無用前驅弩洞獠看收內附旗  
科目自來稱得士勲名要使遠人知

送黃郎中

熙

得告歸長樂

昔年同聽鹿鳴歌此別令人恨轉多  
白髮無情催歲月青山有夢入煙蘿  
養生術秘求玄牝種樹功深問橐駝  
他日訪君何處所海門孤嶼認青螺

送方大參達還家

翠微深處舊時家，乞得身來鬢未華。  
洛社日長人似玉，相城春暖錦如霞。  
壺觴對客菊初蕊，杖屨尋詩梅欲花。  
料得機心都散盡，行行鷗鷺下平沙。

送方大衡還莆

烏石山前舊草堂，秋來鄉思迥茫茫。  
灤西杜甫長為客，戟下馮唐猶是郎。  
驛路連雲行獨騎，海門和月倚危檣。  
請君莫聽南樓笛，一曲梅花一斷腸。

送季弟敬叔還家

身在江東家在閩三年為客得相親  
侍萱同愛堂前日戲綵平分膝下春  
書劍不嫌歸計薄溪山長傍夢魂新  
平安消息應須寄海上春深過鴈頻

題陳永崇城市山林

幾千城市此山林構得行窩趣轉深  
紫陌斜連青嶂路紅塵獨結白雲心  
洛春每向環中探顏樂時於瓢外尋  
老我自憐多野興何時石上聽鳴琴

成化癸卯夏提學侍御婁君謙洎部曹諸君六七

人咸集於西園月出酒酣各有倡和予次韻二首

三載儀曹留宦轍半園風月屬閒身眼前富貴都成幻  
夢裡溪山疑是真樹密不知時已夏花香暗記歲為春  
十年簿領埋頭久此樂今宵難語人

歷歷疎榆轉漢津泠泠風露濕衣巾壺觴豈解延嘉客  
泉石偏能留去人樓鼓聲中頻問夜珠璣唾處盡成春  
請看走馬長安道何處風吹不是塵



游西塔

授閒未製薜蘿衣暫撥簿書游翠微古寺樹深人獨往  
平湖草滿鷺雙飛墅棋成敗猶勞著塞馬存亡未息機  
日落煙深山色紫馬蹄還踏舊途歸

游西塔次潘水部及伍憲副二公韻

出城何處問西巖天際雲開山露尖說偈也應留玉帶  
賦詩無用襲香奩蒼藤古木庭臺靜野餉清齋筍蕨甜  
今日不輸宣守樂尋溪紆組兩能兼

清樽白髮幾人同  
頓覺脩然有古風  
瀼水却能留杜甫  
滌山差可著脩翁  
無邊清思塵埃外  
幾許浮名醉夢中  
畫史未知忘色相  
欲將聲跡繪元豐

登擬峴臺讀曾南豐碑次潘水部韻

摩挲苔刻讀殘文  
往事悠悠付夕曛  
野竦未收前澗雨  
山風遙送隔溪雲  
霸圖馭世應多術  
王道驅民不掩羣  
臨汝依稀同漢沔  
曾無垂涕到裴君

次韻送潘水部歸金陵

腹藏珠玉不為貧神武掛冠今六旬廊廟於人原有分  
溪山何處不容身釣魚每傍秦淮月走馬常尋鍾阜春  
料得他時相憶處夢魂半在汝川濱

郡齋酌別送鄭御史還貴溪用聯句韻

短箔疎簾風雨深一壺濁酒夜談心青山何處尋同調  
白髮此時逢賞音徐穉到門應下榻管寧鋤地獨揮金  
懸知別後相思憶兩地停雲向夕陰

過許金聲瓢所

綠樹深中白日遲  
小瓢收得許多詩  
百年天地藏形器  
萬狀風雲入笑嗤  
沈宋每思傳正印  
許姚會見樹降旗  
雙旌偶上臨川道  
重倚闌干有所思

賞桃和西席陳嘉謀韻

有序

郡圃西有桃橫過書院  
丙午春盛開友人鄭御  
史從儉伍憲副天錫與  
西席陳嘉謀皆有詩嘉  
謀有煙景明年重召客  
知誰重為使君來之句  
今春復盛開伍憲副即  
世鄭御史北上獨嘉謀

與予在馬簿暮公退復命酒以尋前約嘉謀重  
賦詩曰去年今夕此亭臺舊宴諸君約未回人  
事忽驚今夕異桃花還似去年開雨分紅藥參  
差長香傍芝蘭次第栽邀得浴雲池上月共陪  
五馬不勝杯予用其韻賦此

五峰堂北百花臺座上劉郎驚不回疎雨情懷空自愛  
春風面目為誰開久懷漁釣溪頭路不借陽和天上栽  
今日繁華明日改黃昏相對且啣杯

送包好問節推應召之京

千里東風吹綠波馬周此日遇常何  
燈前死獄求來苦  
屏角疑辭錄轉多  
柏樹含霜秋入院  
棠陰過雨晚成歌  
相酬不盡平生意  
三尺龍泉解太阿

送呂貳教還莆

澄鄉榜同年

少年接翅上青雲  
海濶天長路轉分  
白首握符初見我  
青山結屋又逢君  
開園種藥憐多病  
掃石彈琴念失羣  
擬峴臺前春水濶  
為君徙倚幾斜曛

觀漲次潘水部韻

南北依稀路轉迷  
大江倒注入迴溪  
千金不見王家堰  
萬柳難尋蘇子堤  
白屋此時成澗壑  
蒼生何日出塗泥  
憂心百轉勞經濟  
擬峴臺高雲霧齊

寄贈鄭從儉侍御赴京

出處由來多路岐  
對人未敢說玄微  
錦衣烏帽此時去  
綠水青山何日歸  
管晏成名非正遇  
濂閔行義有真機  
相期不盡平生意  
目送飛鴻到落暉

臨汝上老母壽

東風吹入北堂深  
鶴髮盈盈照玉簪  
一百年中今日壽  
三千里外此時心  
白華詩闕從頭補  
綵服懽多次第尋  
誰信吾家雙老母  
酒杯都向汝川斟

鶴洲族兄先亦養  
母林太安人於此

為宋少叅題畫

綠樹深中結草堂  
五湖三泖是滄浪  
雲連北渚通詩社  
日落前村歸釣航  
門外別開花竹塢  
沙頭時見鷺鷥行  
君恩未報愁方劇  
莫向畫圖思故鄉



泉州朱都憲挽詩

名鑑學職起家

曾聞譜牒出莆田徙去泉南世益綿  
鴉食上林分教日烏啼柏樹立朝年  
溫公姓字人皆識道輔勲階世共傳  
千里平蕪寒日暮依依馬首認高阡

入九仙觀訪黃朱軒讀丁郡守所寄詩次韻二首  
卷阿遙想鳳凰聲漢室何人識賈生  
四海治安心獨計百年得喪髮同輕  
滄波白鳥甘遺世綠樹黃鸝正滿城  
天子履元消息好知君未得謝浮名

十年不聽禁鐘聲坐對南山野趣生有道也知當世重  
無官應覺此身輕石臺晚嘯雲歸樹仙觀夜吟月過城  
文物傳中勞去取幾人筆下可全名

過洞庭湖得風寄李使君

洞庭午前湖水平洞庭午後風浪生片帆出沒樹葉小  
一身恍惚鴻毛輕浮雲黯黯結新暝白日杲杲籠微晴  
故人飲我酒未醒回頭不見巴陵城

過桃源有懷避秦諸君子

知君原不是神仙避地偶尋山水偏世去只聞秦用法  
客來方識晉編年桑麻翳翳連平野村落依依帶暮煙  
種得桃花翻自悔春風勾引釣魚船

辰州道中用提學沈仲律韻

辰州道路比褒斜遊子行行無怨嗟山鳥盡情啼別樹  
野棠隨分吐幽花時平猶結防苗寨歲晚誰收逃稅家  
聖主憂民方側席寬書早晚到桑麻

賀守備夏都閫府第成

新開帥府浪城東此日登臨賀客同六月涼颼來細細  
四牕香霧濕濛濛旌旗影裏貌貅靜金鼓聲中豺虎空  
欲為江陵成短賦疎材深愧少陵翁

予有事平冒通判高君

鑑

推官楊君

欽

繼至因相

### 與泛舟為樂

百尺巖下停詩船溪聲帶雨寒濺濺攜壺過江覓村酤  
掃葉傍石烹溪鮮水雲浩蕩不成醉天地寥濶欲登仙  
毋怪當時柳州柳鈞潭袁碣留殘篇

早春出郭呈祁石阡

侵晨出郭喜聯鑣  
馬首人家入望遙  
雲暝孤城微見堞  
雪消春水欲平橋  
山田鳴雉麥猶短  
野箔初蠶桑未條  
經國有謀勞相度  
議將封事上清朝

演武亭小酌和石阡韻二首

百年懷抱此時開  
野酌山歌傍將臺  
村落無期留客醉  
管絃有意送春來  
雪消波影侵詩筆  
雲破山光落酒杯  
最喜四郊無戰壘  
共追周雅賦臺萊

簫鼓聲中又此年客邊情況只依前梅癯竹瘦何曾俗  
水膩山柔還自妍一覺未成猶是夢萬緣若了亦成禪  
琵琶不識此何淚我欲停杯問樂天

貴藩聘修實錄府衛諸公皆出祖石阡有作次韻  
紛紛簪組滿江湄裊裊東風吹鬢絲春草綠波南浦路  
輕塵細雨渭城詩投荒萬里愁無伴傾蓋片時逢故知  
麗澤此行知有益子雲識字喜多奇

晚宿清平衛和石阡午發重安寺韻

十里長亭五里橋太平道路不知遙人家處處皆桑樹  
山隴重重盡麥苗巖雪逢春猶自結林霏過午未全消  
平生慣作江湖夢紙帳梅花又此宵

次石阡韻寄興隆周方伯

塲屋疑名記昔年白頭相見兩茫然權知避處應為福  
官到休時却是仙林下看雲閒倚杖樓頭過雪每開筵  
別來何處相思憶月在梅梢滿意縣

平越曉發麾使林錦興祁石阡同鄉忽以酒餞至

因相與盡歡石阡有作和韻

時寓按察分司

滿道風霜照此堂夜來偶爾寄行裝還家有夢應嫌短  
聽漏無眠却恨長人為故鄉情轉劇酒因好況手頻將  
風萍聚散原無據回首雲山又夕陽

平越道上喜晴次韻

天開羣物露洪纖春事應知日日添梅萼柳梢爭着眼  
草芽菜甲盡抽尖酒中愁陣猶迎敵雪後寒圍未解嚴  
帝錄鋪陳憐我拙三長何幸得君兼



倒用前韻二首

自從騎馬出蒲陽倒指流光二載將  
華髮每驚人世短黃塵無奈客途長  
酒沾竹葉排新悶詩賦梅花添舊裝  
回首故鄉轉迢遞何時戲綵向高堂

客中幽興二人兼和盡新詩韻轉嚴  
山雪撲衣春後薄溪風吹面晚來尖  
帶圍舊眼頻頻換髣髯脚新霜故故添  
何處人家堪買醉近橋楊柳綠纖纖

貴州即事

好山明媚映晴川  
貴省誰言聲教偏  
路遠輪蹄皆入貢  
時平民物不知邊  
華夷普照無雙日  
雨露覃敷共一天  
最喜南來諸逐客  
寒爐次第死灰然

纂修姜進士麟以詩相慰問次韻奉答

手和丹青愧未勻  
繆於清廟繪犧樽  
虞廷事業鳳來舞  
周室太平鷺在疊  
謨典篇章勞點竄  
春秋義例熟評論  
君材自極中朝選  
燈火相依幾夜分

纂修竣事自貴藩東歸路逢京使次石阡韻

問君何日出京畿馬上相逢話轉遲  
朝野喜聞多善政廟堂誤說有相知  
病軀只合淮陽卧散木何煩匠石推  
四海和平宗社固鹽梅不必問伊誰

次石阡曉發新添韻

山脊如鉞半插空西南道路此時通  
汲書王會今初見周禮職方舊不同  
目送孤雲天際白手遮初日馬頭紅  
宦情羈思相催促因笑浮生太遽匆

東歸至清平陳憲副王都閩相與遣使迎勞用和

石阡韻奉謝

堂陞多年形勢分臺臣間帥兩殷勤舊時宰相不輕士  
今日將軍能好文馬首青山情戀戀路旁草木意欣欣  
來宵有夢落何處月照梅花疑見君

歸至鎮遠次祁石阡荅家人相慰藉韻

一官飄泊共遐荒文事驅人偏自忙藜杖遠分天祿火  
梅詩旋入鎮陽裝形骸莫逆憐同道萍水相逢忘異鄉  
為語家人莫驚訝鬚毛原帶去時霜

和初石阡雪後感懷

宦業何須更乞靈  
半齋燈火自熒熒  
浮蹤聚散鴻留爪  
瘦骨稜嶒鶴化形  
月下梅花輸爾白  
雨中山色為誰青  
幽懷萬斛難輸寫  
莫惜行囊買酒金

荀麾使座上得報原謫鎮遠府通判高君

鑑

量移

青州府賦此為別

玉樹丰姿初識韓  
別離頗覺此情難  
煙含山色孤城晚  
雨挾溪聲兩鬢寒  
黔郡詩篇收舊稿  
青州邸報有新歡

臨行贈處無他說忠孝相期此肺肝

除夕聞雷

時在鎮遠

歲事闌珊氣候分雷聲忽向枕邊聞隔牆疑是鄰燒竹  
入耳驚為野聚蚊啟蟄不應先夏令警聾似欲破苗氛  
劉家父子多同異傳志災祥說正紛

題卧義軒

郡中無事自開荒小作軒居接北廊天地清風來枕簟  
湖山白日卧義皇意當適處功名薄心到虛時道義光

彭澤有魂招不起憑誰接膝與商量

諱日夢見先考音容如昨既覺不勝悲感而作

湖海奔波三十春歲逢諱日倍思親雲霄事業憐沉晦  
風雨詩書記苦辛腸斷獨揮千里淚恩深難報百年身  
半牕燈火齋房靜警效分明入夢新

謁諸葛武侯廟

萬樹鴉聲送夕曛孤祠寂寂倚江濱  
霸途獨識炎綱正國執終成鼎足分  
伊傅襟懷明日月軒黃行陣結風雲

相材將畧寡儔侶一辦心香特地焚

偏橋分司與王少參讀陳簡齋詩感而有作

簡齋居士詩中仙胸懷不著火與煙京洛數椽家已破  
湖湘萬里春無邊天高地迴見孤鶴風清露冷開芳蓮  
前途泥淖不可往與子相逐蓬壺顛

覺衰

形神日日覺支離此事到頭吾自知鵬賦不須傷賈誼  
鈴歌試自學桓伊卦分離坎勞收拾藥煮參苓空護持



渴飲飢餐惟待盡古云知命有何疑

哭祁致和方伯

乘雲何處去登仙老淚雙揮袖欲穿執紼謾懷千里外

修書猶記十年前

弘治己酉在貴藩會修憲宗實錄

中州孤鳳東夷識

公奉使朝鮮朝鮮人敬慕之

郢下陽春海內傳多少情懷談不盡憑

誰傳報到黃泉

天人感應吟

人心纔動老天知誰道天高人可欺暗漏屋中神亦格

高明家裏鬼常窺是非有路終須審禍福無門只自祈  
點檢人間興廢事毫釐應付不差移

五言絕句

書東園屋壁志感

太山拔不動流水激不回萬古青天在此心安可摧

題畫龍虎

蹤跡謝塵泥精神動寰宇我為蒼生憂呼爾作霖雨  
文采蔚斑斑爪牙利如琢白晝舞狐狸待爾出林壑

簡齋

太羹有餘味大樂無繁音茅齋坐白日冥契千古心

成化丁未聞解郡作

解郡復解郡解郡乃吾志談笑離別間行我心上事  
馭世既濶疎賦性復麤梗聖恩天地寬使我全首領  
母老兒亦老何幸得生全故鄉有敝廬菽水盡餘懽  
拂袖歸田園閉門謝鄉相白雲有去來青山本無恙

繼聞改郡重作

青山城郭靜白日文書稀百拜謝君恩臣職此其宜  
廣成住崆峒庚桑居畏壘一鞭山色中吾道無成毀  
母恩不可割君命不敢辭舍母以就君白首成歡歎  
人生天地間俯仰無百年天風吹游絲隨處成罍牽

過嘉魚縣贈姜希廣大尹二首

作縣憐今日讀書記昔年相逢江上雨十日為停船  
去矜師上蔡做信學乖厓德進業同進民心誰不懷

讀惻隱書寄廣德過俊翔

予知廣德日嘗著戒殺女歌及定諸條約教讀  
過俊翔乃和此歌及添註脚名惻隱書姜尹為  
之梓行

偶過嘉魚縣因觀惻隱書雲山千里外為此一停車

題林仰止齋居

青山原有約黃屋本無期獨坐雲生榻閒吟月到池

荅魏竹溪

多病厨中藥消閒枕上書青山當老屋此興近何如

入納溪二首

兩岸青山合一溪，春水深蘭橈須慢撥。處處可娛心，  
六堡風塵息。千山草木深，賈船隨處宿。日夜不驚心。

好奇

平生性好奇，作字亦如之。老去歸平澹，時人應未知。

幽懷

健犢常僮駕，驚魚不上鉤。幽懷落何處？烟月滿滄洲。

俟軒二首為陳玉光賦

萬數皆無著一心長自虛涼風吹短髻看到有生初  
塞馬風塵暗海鷗煙浪深虛舟汎天地無用更勞心

題石泉清隱

六合紅塵滿幽人何處居飛泉迸石面清韻落郊墟

題有竹軒

半畝翠雲濕一簾蒼雨涼分明闌闌裏舉目見瀟湘

題鎮遠何貳守東巖四咏用林見素韻

雞鳴桑樹深犬卧苔花濕何處課春耕獨倚斜陽立

右南畝春耕

長江春水滿瀾瀾  
綠如苔行人過江急  
江濶船不來

右藍江晚渡

石濕雲不起  
石晴雲亦逗  
對石閒觀雲蒼翠  
落衫袖

右古石堆雲

江暖雪初作  
江寒雪漸飛  
一竿潭水上  
雪深猶未歸

右寒江釣雪

雜咏四首



珠藏澤自媚玉蘊山含輝憑君細調護至寶人間希  
抑奢以從儉去偽以返淳咀嚼六經髓呵為天下春  
海晏河清日風調雨順時大家惜元氣保此萬年基  
帝德乾坤大親恩江海深勉修忠與孝莫負此生心

哭樞姪喪婦

予攜樞姪入蜀為娶婦不幸乳死夫弱子幼賦  
此以泄予哀

妻沒夫誰助母亡兒失依兩行生死淚都上老人衣

桐川儒學雜詠

有引

成化辛卯予承乏廣德州又明年癸巳乃遷學  
宮既為山亭池館以護形勝以補學制之所未  
及因擇其有關於化理者以定名稱而使來游  
諸君子得以維持心身於不放之地文學稼賈  
君汝易乃取而歌咏之一時過從諸君子又從  
而和之裒輯成卷持以語予曰學制新備此可  
以存故實矣執事宜有言予思在昔諸公補郡

縣日於政事之暇多有文章流落山水間心竊慕之因和汝易所歌咏者而并識其畧他日由是學而出者必有識予懷云

覆土為此山欲以種芳樹山成樹轉多相呼掇芳去

右萬桂山

山在學宮正北高四丈長一十三丈皆築土為之

有峰如玉笋其勢高插雲我欲招諸生引手排天閭

右凌雲峰

在萬桂山正中

山頭日漸上山下日漸明遲爾五色鳥來為吾道鳴

右朝陽嶺

在萬桂山左臂

揭衣登西嶺風葉寒飈極目望天際有鶚橫清秋

右橫秋嶺

在萬桂山右臂

心清見肝膽水清見毛髮一私無所容聖功由是作

右澄心池

左在山下退省軒前偏

形直影亦直形曲影亦曲曲直各有自吾當慎吾獨

右顧影池

右在山下退省軒前偏

人世少知遇百年懷抱孤山亭坐虛敞邈與天為徒

右天游亭

在凌雲峰下

周禮久不作澤宮變荒圃開亭集賓佐觀者日盈堵

右觀德亭

在龍首峰下

高堂絃誦息呼童撒臯比開軒望北山靜以省吾私

右退省軒

在學宮後

山房白日靜左右列圖書哲人久不作掩卷空歎歔

右萬桂山房

在橫秋嶺下

有池大如斗瀰瀰北山下朝拾五色羽鳳凰浴初罷

右浴鳳池

在朝陽嶺下

山坳最深處游人慎莫入曉來雲氣腥中有神龍蟄

右蟠龍窟

在橫秋嶺下

北山有危坡都植蘭與蕙平生性好修掇拾以為佩

右蘭坡

在山前少東

開徑入松林松香滿冠屨行行細護持茯苓在深處

右松徑

在山前少西

開園種修竹竹實生何遲玄雲閉白日鳳凰正苦飢

右竹圃

在萬桂山後

山勢何糾紛龍頭突然起蛇蟲走其足竄伏莫敢視

右龍首峰

在萬桂山正東

憶昔侍金鑾顧瞻龍尾道今日登高岡彷彿夢中到

右龍尾岡

在萬桂山正西

寧國道中書所見七首

足馬赴寧川靡靡行不止水色與山光一百二十里  
聽泉如聽琴看山如看畫佳趣滿眉睫應接都不暇

樹罅天光漏山坳雲氣深遙遙聞犬吠人家無處尋  
野曠路紫紆山轉林斷續長歌者誰子隔溪聞伐木  
懸崖危欲墮急湍嚙其趾世路多險巇君子慎所履  
小民飾虛詐水燥而火濕呵之不肯起猶向馬前泣  
山人生計拙種桐滿山樾春來風雲多桐花開不結  
醉中題畫扇四首

輕颺拂涼樹明月浸清波酒醉呼不醒萬物將吾何  
青山雲去後古樹鶴來初安得結茆屋閉門觀古書



青山日未上綠樹雲猶濕溪迴路轉深扁舟何處入  
山前去路賒江上片帆遠家鄉在何處一日腸九轉

題松鶴軒

階下蒼松立階前白鶴行軒中何所有終日此雙清  
松外見白鶴鶴外見青松小軒終日坐清氣落重重

題畫山水四首

開軒望長野迢迢芳草綠持竿彼何人冒雨驅黃犢  
雲影蒼樹涼雨候黃梅過明月入西軒照見幽人卧

秋水池塘深落葉亭臺晚柴門閉西日山人猶未返  
風高海水立雪厚山岡折小院無人來梅花自娟潔

又四首

萬里長江水春深可染衣天涯何處客遙逐北鴻歸  
青山夜對坐默默無一語天風動林薄明月生洲渚  
山高白日下野濶孤帆遲故鄉在何處欲歸未有期  
天機常自契妙趣向誰說歲晚無人來獨釣寒江月

又四首

青山見孤塔綠樹空  
茆亭畫師不解意  
欠我六尺藤  
山到江邊盡洲當水面橫  
鳴榔歸浦慢回首夕陽明  
天地鬚毛短鳬鷗心事閒  
五湖風月好都上釣魚竿  
山雨洗蒼樹江風吹綠波  
小亭人不到詩思晚來多

游廣德東山寺三首

地窄剛容寺山深不見人  
回頭望城郭無處不紅塵  
屋外山雲濕門前溪水寒  
禪心安未穩明月上蒲團  
山高日易下地滑雪初消  
共說前途險溪深獨木橋

題畫鶴

夜露滴松梢秋聲退殘暑不知九霄夢凌風高幾許  
海上風露寒羽毛半零落短日脩疎翎去去翔寥廓

黃巖謝孝子遺事七首

奉母避亂為軍士所執以死衛母

母死兒亦死母生兒亦生兵力是何物門外自縱橫

避亂母病無醫藥刲股以愈母疾

持刀刲股肉股痛兒不知豈不戒毀傷母病兒若癡

亂定奉母歸自昌國自製小竹兜舁母取母便  
適日行數里輒止

翳翳白日靜遲遲青山行心兜試寬窄恐母坐不寧  
春日負母出嬉

茆簷春日溫兒背穗如几問母欲何之行行過東里  
種蔬養母每本各置蘊以防不潔

種蔬屋東頭供母朝夕需母性最好潔兒蔬敢自污  
往昌國取貨夜夢母盛妝以為不祥遂棄歸

取貨東海上夢母為盛妝今日在路上明日在母旁

葬母廬墓十年始歸

親魂歸室廬親體托林巒如何謝孝子守墓久不還

哭羅一峰五首

天地不為小一身無所容荆榛是何物往返迷行蹤  
漆室發長嘯杞國懷深憂淚洒綱常疏十年未全收  
人心皆孔孟世道皆商周此意無人會西風吹古丘  
白日金牛洞青雲丹鳳樓思君不可見新月上簾鉤

百年夢不起千古懷獨醒西湖煙雨外零落一峰青

送孫常州仁入覲

宦情長淡泊行橐轉蕭條獨有秋山色相隨遠入朝

贈徐生二首

開田種嘉禾禾根須著土君看丹青家爛漫竟何補  
得喪非無自操縱原有由明珠在方寸象罔難與求

次丁鳳儀見懷六首

坐君白石屋

君號

彈我秋雲根

琴名

幽興不可極欲說難為

言

靈芝固無種仙藥寧有根至寶在人心六經不盡言  
陰生為月窟陽生乃天根陰陽互相長天地寂無言  
草堂近翠微霧靄撲人衣乘興欲相見到門翻有違  
浮雲掩少微蒼狗變白衣世態正如此孰從將孰違  
寒林煙火微掩脰無全衣世非不我用我道與世違  
董子仁少參出中流砥柱圖求題

狂瀾撼風雷砥柱屹不動根脚苟未固豈能排瀕洞



題海雲卷

朝看海雲出暮看海雲歸而我亦海雲出入澹忘機  
題吳冬官淮南別意卷

江館三年夢雲山萬里秋欲知相別意淮水向東流

逸老堂為謝太守題

鳴治先生之叔

萬里江天迴冥鴻獨向東草堂寬幾許可以著清風

題日出扶桑圖

虞淵路最遠憑誰取紅日引手抉層雲清輝流八極

題月沉西海圖

碧海最西處懸知物象幽魚龍見明月應作白日遊

題伊秋官三秋岐路話別卷

世路苦多岐問君欲何往吳鉤三尺長光射斗牛上

題孫氏映雪軒

銀燈照華屋寶鼎薰金埒念此苦心人獨映寒窗雪

題孫孟獻弘毅齋

萬里程途遠一肩負荷難藕溪溪上路風雪見蒼顏

金溪車節推挽詩

氣結芝蘭馥，曾燭錦繡紋。大廷吐不盡，散作冶溪雲。

挽吳下王處士二首

車馬閭門路，生前多故知。青山映疎雨，有客為書碑。  
里巷誦遺德，縉紳思舊游。太湖春水濶，不復見歸舟。

七言絕句

題歸隱圖

青山綠樹舊時家，宦況何如隱趣賒。料想西湖明月下，

夢魂先已到梅花

紙帳

紗厨罩暑籠香霧錦幔圍寒擁綵霞曾似道人養清素  
白雲洞裏夢梅花

與同年熊騰霄分舟之任臨別賦此

賦分不嫌蟲臂小居官曾笑繭絲非六經自有安民術  
莫向勞門苦著機

喜姻友林貴實侍御得告

霄漢冥冥見羽毛  
秋飈涼月送詩豪  
長安回首渺何許  
一任雲臺萬丈高

夜宿東坡寺與李天瑞論學

興國寺中談道日  
鵝湖山下論心時  
百年公案今宵合  
接得乾坤真化機

為葉左參題寫騷亭

藝苑開荒歲月勞  
幽蘭香芷雜江皋  
白頭心事無人識  
風雨滿庭自寫騷

酬同年談君

憲章 惠筆

吳筒細剪南山竹  
韓穎精收東郭篋  
多謝故人有佳貺  
興來揮斷楚江雲

送羅應魁內弟歸永豐

客館西風布被單  
百年心事惠夷間  
也知內弟能相信  
萬里輕舟自去還

送謝元吉御史赴南陵丞二首

風雪飄搖滿帝城  
老鴉臺上噤無聲  
南陵草色春長滿

疋馬徐行好問耕

楊子江中白鷺洲淡煙疎雨布帆秋到時為問賦詩者  
南逐年來共幾舟

送賀克恭黃門得告歸遼左二首

故國溪山病裏還半生心事語人難牀頭舊有匡時疏  
不許旁人來借看

牢作根基築室廬此中真樂世應無閒來舉目平鋪看  
雲滿青山水滿湖

贈羅明仲內翰二首

流水奔馳出亂山千條萬派落人間  
箇中些子纖迴處我欲煩君盡日看

湖海茫茫一葉舟四時風浪拍天浮  
煩君牢守梢頭舵滿載行人入坦流

送丁克明歸常州省親

萬里雲山秋獨歸為憐堂上旨甘違  
天涯亦有思親者相送不堪淚滿衣



題劉先主三顧草廬圖

吳魏有兵窺社稷  
荆襄無地著英雄  
將軍識得人中傑  
自把旌旄起卧龍

題山水圖

茆廬三五野人家  
路入青松更轉斜  
城市收書歸去晚  
山風吹落一庭花

挽陳菊菴

生平原不愛繁華  
滿院西風種菊花  
今日江州想遺德

白衣送酒入誰家

哭陳生

煌

絳帳曾施種德門  
兩階玉樹吐清芬  
重來不見凌霄幹  
淚濕青山幾片雲

題梅月圖

孤山處士舊時家  
門巷深深一徑斜  
惆悵詩魂呼不醒  
只留明月照梅花

客中逢燕

江上曾逢燕子飛，淚痕三濕遠遊衣。  
小樓此日重看燕，人在客中猶未歸。

題友人張汝弼天趣軒

石鼎初分陽羨茶，翠盤又試邵平瓜。  
當時頗笑淵明俗，都把俸錢付酒家。

神樂觀張道士號體圓軒乞詩

金爐火暖養丹砂，滿院靈光含紫霞。  
野鶴不鳴春晝永，玉笙吹落碧桃花。

送丘大尹知黟縣二首

疋馬南行去路賒  
青山迤邐到官家  
地圖試問寬多少  
剩種桑麻莫種茶

黟中風俗近如何  
雀角鼠牙知不多  
君到山城無別事  
棠陰滿地聽絃歌

寄東陽二教黃亨仲二首

燈火窮經二十年  
一官贏得守青氊  
近聞浙水推師席  
盡道東陽有鄭虔

客窗風雨夜蕭蕭曾別銀缸共寂寥別後逢君何處所  
夢魂時落淞江潮

送友人丘時雍遼東省親

綠酒紅亭正夕暉問君東去幾時歸路過山海秋風早  
莫待馬頭黃葉飛

題亡弟敬叔畫菊

一花一葉盡天機趣到無言識漸稀遼鶴不歸霄漢遠  
只留秋色照巖扉

威州分司夢還家覺而賦此

時弘治甲寅歲二月初五夜

亭上青燈照雨寒  
亭中孤客鬢毛斑  
高堂歲晚無消息  
萬里關山一夜還

題陳搏大睡圖

蟻鬪狼爭滿世間  
傳聞牛耳屬齊桓  
洞門深鎖華山月  
黃屋不如茆屋安

題圮上授書圖

天地機藏一束書  
幾回欲授又躊躇  
漢家四百年天下

都在雞聲未唱初

山齋為鄭民部

岳賦

樓閣空中避打乖  
文辭場裏恥為俳  
山人自有山人學  
翠竹蒼梧深著齋

贈方松崖擢湖南憲副

正氣驅人呼不回  
兩年看徧故山梅  
洞庭春水連天碧  
又見危檣破浪來

送黃伯望知肇慶府



幾度傷心憶嶺南  
民刳兵燹喪田蠶  
黃堂此去看經濟  
千里春回雨露酣

贈陳石峰入京謁選

名琳先以提學御史言事左遷

雪霰初消道路平  
馬頭紅日照行旌  
丹山毛羽非凡鳥  
擬作朝陽第一鳴

贈陳惇賢黃門應詔北上

煙霞自分卧方壺  
詔使忽從門外呼  
五色石花烹煉慣  
補天應不費枝梧



贈郡推鄭公宣  
改廉州經歷

自將鋼鐵鑄吳鉤一道風霜凍不流日暮滿天風雨惡  
不知何處是廉州

挽程孝廉二首

洪武初樂平程閱以孝廉舉為絳州儒學訓導  
其父為平陽府學教授以撰表得罪當死閱棄  
官求代詔並戮之旋奉旨釋縛則已殊矣其孫  
會元楷乞詩為賦此

戴此頭顱贖父刑誰知不得比緹紫斷魂化作雙飛鳥  
飛薄青霄日月明

霄漢雲深雨脚纖難將隻手引龍髯西風吹斷萊衣夢  
空使人間哭孝廉

翠渠摘稿卷七

欽定四庫全書卷

翠渠摘稿卷八

續編

明 周瑛 撰

文昌祠說

今天下郡縣學多建文昌祠祀所謂梓潼帝君者守正之士嘗撤其祠矣然未有明白著說以辨之者考天文志斗戴筐六星曰文昌宮一曰上將二曰次將三曰貴相四曰司命五曰司祿六曰司災占天者謂文昌六星

乃天六府主集計天下事又司祿主賞功進士考周禮  
大宗伯掌天神以禋燎祀司中司命說者謂即文昌宮  
第五星四星也由是觀之則所謂文昌宮者指天星而  
言所以祭者則隸於大宗伯也今夫文昌宮正中而坐  
者為梓潼帝君帝君左右二童子曰天聲曰地啞相傳  
帝君判天祿二籍職貢舉天聲口得言而耳不得聞地  
啞耳得聞而口不得言故其事秘密又有九十七化書  
謂帝君所作大都竊吾儒之緒論飾異端之邪說詞人

學士不知其妄爭祀之吁亦惑之甚矣夫道莫正於孔子而人之為學莫先於孔子孔子曰死生有命富貴在天所以教人定心志也又曰言寡尤行寡悔祿在其中矣所以教人修人事以聽天命也漢董仲舒對江都王曰正其義不謀其利明其道不計其功論者以舒為學得孔門正路以其知聖賢所用心也今方建學校以講明孔子將欲使學者翕然趨之顧乃祀怪誕無稽之神而導以奔走利祿之路其可乎愚謂得全璞當毀砮砮

種芝蘭當鋤荆棘孰謂孔氏門牆而此淫祠可無撤也

鬼說

有鬼乎曰無鬼也色如削爪

鼻

膚如植鰭

傳

身如斷菑

周公首如蒙俱

子

以上俱

見荀子

此其人死且數十年鬼貌怪

形人無見者無鬼乎曰有鬼也介而行披髮而踊豕立  
而人啼向王以射王伏弋死其事甚怪也然則鬼有無  
何居曰人之生也泊乎其氣耳氣聚而生氣散而死散  
而未盡而崇興焉蓋氣盡而死者魂歸於天矣魄歸於

地矣崇何從興故臯陶傳說周公孔子死不為怪者氣盡也氣未盡而死者魂升而沉魄降而滯故鄭伯有趙同公子彭生周大夫杜伯死而為怪氣未盡也然則無鬼者其常也有鬼者其暫也雖曰暫有終化而無君子謂之無鬼可也

### 震雷說

成化癸巳春州民有震死者或問曰雷有形乎曰無形也無形而震者何也曰陽決也陽動而陰靜陽闢而陰

翕二者其性相反也惟其相反而不相得故其勢相持如仇然於是動者欲出而為靜所制闢者欲散而為翕所拘故陽挾陰以行飛走振迅動盪盤薄或左或右勢無定在久而陰負則陽決矣陽決剛之至也遇木則木折遇石則石裂遇人與獸齧粉矣雷何擇於木石人獸也哉遇其決耳曰雷無形而人拾得雷斧者又何歟邵氏謂星與雷皆石氣也星殞於天而化為石雷震於地而化為斧皆石氣也雷何形哉



續修族譜序

弘治丙辰歲瑛奔太宜人喪至自蜀越明年丁巳吾族  
遜菴兄偕諸弟姪奉牒以來曰譜所以紀世也吾家世  
綿而譜逸周之故無考焉此譜正統丁巳歲錦衣府君  
在官所修者舊而未續韓子言十日十二子相配數窮  
六十自前丁巳迄今丁巳六十數窮矣易謂窮則變變  
則通敢以此譜累子謝曰瑛不孝禍延先妣方以不自  
死滅為恨安忍他圖衆則曰譜上係祖宗下係孫子子

必勉之瑛悽然以思已而俛焉以聽因記童兆時嘗錄譜牒以奉先緒苦不得其要領比長讀從祖守約齋遺書得壺山翁先世紀事始知舊譜而逸者尚多也按紀事周氏唐固始人系出周平王別子唐末盜起周氏有從雅翁者與王潮兄弟同里閨厚相結納保障鄉里嘗柵梅林以扼盜衝翁料事多中潮因呼為梅林獨識及潮得閩泉州刺史翁謀依潮筮之吉乃以光啟三年入閩潮見翁喜授宅里於泉州仙遊縣之東鄉翁治居第

有堂有廊鄉人將上堂必先上廊因呼上廊周氏自梅林以下尚數世有紀凡此皆舊譜所遺者乃合而修之其目三一曰譜系譜系分上下上書入閩以來諸祖下書遷清浦以下諸祖其二曰譜識譜識摘書列祖之梗概以存故實其三曰譜翼譜翼以義起蓋以譜識簡畧不足以盡事故別為譜翼以足之也譜翼分內外集視事輕重各以類從既成思與諸賢哲更相確正不幸而太守鶴州兄先逝而不及見憲使姪歸共校而未終踰

十餘年曾姪孫侍御君以母喪起復乃考校前譜系所未系譜識所未識其譜翼分為前後者各以類修補之又考官譜紀事與譜翼並藏於是周氏譜稱大成焉嗟夫修譜以紀事為先而譜識譜翼所以錄其事也思其人而願見其事則於遺事致詳亦宜也記謂父祖有善子孫不知是不智也知之不傳是謂不仁然則吾譜之修其仁智之道哉嗣世君子宜領此意

自撰蒙中子壙志

蒙中子興化府莆田縣人姓周氏名瑛字梁石自謂學  
無所就其中蒙故號蒙中子又喜賁上九敦尚質素不  
為華僞學而未能號曰賁道人又與族人鑿渠種蓮以  
居號翠渠翠渠之號頗行於時曾大父諱驕字正甫大  
父諱世字顯庸父諱舉字尚哲贈知州母潘氏太宜人  
家故民籍洪武初以備倭改戎籍知州公執戎鎮海生  
予與二弟曰環曰頊予年十四挈歸莆依叔父諱從以  
居從贈刑部主事朱公昱御史葉公巒繼從儒士吳公

時耕繼而往反莆漳間與溫陵陳剩夫相過從談程朱之學嘗以書抵剩夫云人有古今心無古今三皇五帝之道期以海滢見也景泰癸酉以衛學生薦於有司與族子轍同時取鄉第成化己丑登張昇榜第二甲進士又明年辛卯出知廣德州三年今都御史侶公鍾時為御史按部南圻上予治狀詔覈實父母妻室俱受封庚子冬遷南京禮部儀制司郎中三年赴吏部考覈未到遷撫州知府先是族兄瑩亦知撫州人因呼為大小撫

州云予初有大志敬盡讀天下書以觀斯道大全而求  
夫子素所謂一者期以年過四十始仕既而都指揮桂  
同知鎮海事督戰莆田識予諸生中呼知州公前曰有  
子在家何不蚤圖為門戶計知州公以書趣予於是始  
泊沒塵途而初志為始奪所著有經世管鑰字學纂要  
祠山禱錄周氏家語閩川稿桐川稿臨川稿金陵稿金  
臺稿若干種藏於家凡平日居官行己俱無足述但頗  
知畏天命凡事每自檢於心以求合於天則恒自喜曰

此吾學之得也初娶鎮海衛陳氏繼娶同縣吳氏皆封  
宜人子二長大櫟娶同縣按察使林公坦孫女次大謨  
聘南京吏部尚書陳公俊女女七象峰邱謙冲溪王珊  
其壻也龍門林近龍龜塘廖奇逢後吳吳世楨吳天光  
乃其所許未婚末女尚幼成化丙子年五十七故莆倅  
張公哲過臨汝謂在莆田嘗禱雨壺山絕頂見有地可  
卜藏予疇昔愛山每躡屐登高往往有翅視八荒蟬蛻  
下土之意聞倅言喜曰是可以授我矣因遣人經營其



地且先自叙邑里世系履歷以授諸子曰我他日棄諸  
子諸子無妄費金帛粉飾吾事以誣天下後世但納此  
諸幽使他日與吾戚者有以掩吾之遺可也且勒石之  
銘曰氣聚吾生兮氣散吾死聚散常事兮吾何悲喜人  
授吾地兮壺山之巔屹立萬仞兮摩於青天中有靈湫  
兮我其司汝鞭笞靈物兮為雲為雨愧無利澤兮遍於  
八荒願藉杯酒兮以澤我故鄉

翠湖雜咏

翠湖吾周氏聚族之所暇日擇其入題目者十  
有四事各賦詩以紀之所以存吾家之文獻也

我愛主人家溪流帶屋斜得詩曾夢草對譜旋栽花養

鶴汀洲近

家與鶴洲鄰

棲鸞枳棘賒有孫能作賦躍馬入京

華

右小溪

玉帶人間少吾家有此溝天門從亥入地戶向坤收夜  
雨書燈亂春雲墨汁浮行看好孫子應識步瀛洲

右玉帶溝

宿墨洗初罷春雲驚滿池  
暝分天色澹寒逗日光遲  
鷺下應先覺魚遊渾不知  
學書憐未就深愧漢張芝

右浴雲池

有露濃如酒瀼瀼降此洲  
八年曾兩結十日未全收  
月映祥光淡煙籠瑞氣浮  
平生看墨本此處識天休

右甘露洲

佳樹列門前栽培自昔年  
舊根龍偃仰老榦鶴蹁跹  
影

金  
八  
卷八  
礙半天日翠分十畝煙李孫宮裏賦應可續韓宣

右水棉樹

湖上無多地分明見秀峰晚烟含紫翠春雨長蒙茸九  
華應爭秀五侯欲並雄他年問何有百尺看高松

右芙蓉峰

獨向高堂坐清風問伯夷不知孤竹國何似首陽芝布  
被煖如纈藜羹甘若飴人生各有志吾自得吾師

右清風亭

養鶴向江洲每憐江事幽沙鷗同入社野鷺避迴舟夢  
落松巢冷路分鵬背秋好詩滿人世燈火為重篝

右鶴洲

渠水映柴扉春深可染衣天光帶雲影魚躍間鳶飛世  
路塵埃遠道懷聲利希蒼苔滿白石獨坐對斜暉

右翠渠

改屋以為亭昔人疑亦曾笋芽穿壁入茵茸傍欄蒸晝  
卧雲為幕夜吟月作燈許多幽勝事欲賦愧未能

右昔曾亭

川中何所有榆樹正扶疎  
日色晚來好秋陰濃似初  
官閒分子祿身健課孫書  
更擬門前地容停駟馬車

右榆川

養鶴人何在北園空此亭  
樹當原座綠草傍故堦青  
近水長橋卧小山怪石層  
好詩吟未就落日滿疎櫺

右水雲亭

花草交前院亭居背夕陽  
晚來宜杖屨老去可壺觴  
烟

合山光紫霜寒月色黃  
久飛吾亦倦思與共徜徉

右宜晚亭

蚤依翠湖住晚傍翠湖歸  
天地一亭小功名兩鬢稀  
春雲鳴社鼓秋雨暗魚磯  
俯仰全無事吾心已息機

右歸來亭

和兄鶴洲延綠堂諸公作

亭內幽芳手可拈  
亭外綠陰分四簷  
主人出去雲在榻  
獨客行來月滿簾  
佳禽四五似相語  
小竹二三初放尖

自古天公惜清況賞心樂事誰能兼

和水雲亭諸公作

此心何處洗塵埃家有小亭渠上開山雨未收雲尚濕  
江楓欲落鴈初來食蓴偶並季鷹駕對菊思銜陶令杯  
最喜賞音人不遠小航頻到鶴洲回

題歸來亭

天地孤亭小江湖倦客歸不圖鐘鼎食來試薜蘿衣鷗  
鷺波濤濶風雲聲跡希世情方起滅吾自息吾機



題環壁亭

亭外水如壁僅容一杓通蘋風秋瑣細蒲月夜玲瓏坐  
卧皆天上往來疑鏡中主人原會賦收拾若為工



本傳

附錄


鄭岳

周瑛字梁石號翠渠以鎮海衛學生應景泰癸酉鄉薦  
主司鼎大年得其文大奇之置詩經第二屢上春官不  
第乃益汎濫羣籍務鈎深探賾與南海陳公甫遼左羅  
克恭上下其議論且相期以退隱為高第成化己丑進  
士知廣德州倣古為治興文教絕淫祠表死事之忠而  
嚴不舉女之禁教民有錄祠山有辨廣德人為立生祠  
事之滿九載陞南京禮部儀制司郎中又三載陞撫州

知府興水利著政本第輸納著政均力行保伍之法豪  
右以為不便調知鎮遠因俗為政不鄙其民以書滿歸  
省母孝廟初三原王端毅公為吏部即家起為四川叅  
政尋轉右布政使丁母憂服闋乞致仕給事楊廉吳世  
忠交章以學行薦吏部覆奏起用堅以引年請迺晉階  
榮祿大夫致仕瑛丰神矍古其學不專於該博而於天  
文地志造化物理皆嘗究心體索為文章渾深雅健有  
根柢詩格調高古字畫初學晦翁變為奇勁應酬至老

無倦意所著有經世管籥律呂管籥字學纂要詞學筌蹄地理著龜晚年尤注意周易參同契作本義屢加刪定詩文有翠渠類稿若干卷所修有廣德志鎮遠府志蜀志漳州府志又與黃耒軒同修興化府志議論間有不合自謂莆陽拗史云卒年八十九先是壺山石墜意必有名士當之既而瑛卒平生急義祿入以給内外葺功之孤貧葬其不能葬者十餘喪不計其家有無沒未幾家益落子大謨博學能文以詩經魁禮闈告歸終養

亦繼卒



翠渠摘稿卷八